

SINAR HARIAN 6 APRIL 2018 (SUNGAI) Page 19

Dam aji masuk Malaysia Book of Records

KOTA BHARU – Kejohanan Dam Aji Antarabangsa 2018 diiktiraf oleh Malaysia Book of Records (MBOR) sebagai Rekod Penyertaan Terbesar dalam Pertandingan Dam Aji di seluruh Malaysia dengan penyertaan lebih 2,626 peserta dari seluruh negara.

Pengumuman tersebut dibuat Timbalan Pengurus MBOR, Mohammad Alex Edward di depan semua peserta terlibat di Dewan Institut Pendidikan Guru (IPG), Kota Bharu, disini.

Program julung kali diadakan itu merupakan anjuran Yayasan Generasi Malaysia dengan kerjasama Universiti Malaysia Kelantan (UMK) dan Persatuan Kelab-Kelab Belia Malaysia (MAYC).

Timbalan Naib Canselor, Hal Ehwal Pelajar dan Alumni UMK, Profesor Dr Zaliman Sauli berkata, peserta kali ini melibatkan pelbagai kelompok iaitu pelajar sekolah, penuntut pusat pengajian tinggi, pekerja agensi kerajaan dan juga kelab dan persatuan dam aji di seluruh negeri.

"Untuk pertandingan kali ini, kita sediakan tiga kategori iaitu bawah 12 tahun, bawah 18 dan atas 18 tahun. Malah ia juga melibatkan penyertaan daripada 12 negara luar yang terdiri daripada



Zaliman (dua, kiri) dan Zaluzi (tiga, kiri) menunjukkan sijil MBOR yang disampaikan Alex (dua, kanan) pada majlis itu.

Jepun, Senegal, London, Australia, United Kingdom, Indonesia dan Thailand." katanya kepada media.

Turut hadir, Pengarah UCTC UMK, Profesor Madya Dr Mohad Anizu dan Ketua Pegawai Eksekutif Yayasan Generasi Malaysia, Dr Roslan Basaruddin. Majlis perasmian dilakukan Ketua Umno Bahagian Pengkalan Chepa, Datuk Zaluzi Sulaiman bagi mewakili Datuk Seri Mustapa Mohamed.

Untuk pertandingan kali ini, pengatur menyediakan pelbagai hadiah lumayan berbentuk wang tunai dan juga sebuah motosikal bagi memberi lebih semangat kepada peserta terlibat.

Sementara itu, Zaluzi ketika sidang media yang sama memberitahu, ini merupakan kejayaan yang cemerlang kepada rakyat di kawasan Pengkalan Chepa dan rekod ini boleh menjadi contoh kepada kejayaan yang lebih cemerlang lagi selepas ini.

"Saya berharap pelbagai kejayaan cemerlang lagi boleh ditempa untuk masa akan datang dan harap juga kejohanan seumpama ini akan terus diperkasakan memandangkan dam aji ini adalah permainan yang amat bagus untuk menguji minda dan matematik. Permainan ini bukan sahaja popular di Kelantan, tapi semua tempat," katanya.